

## Ambakiti konsejuecha para tsípikua jingoni irekani





Vol. 3, núm. 1 2021 PURÉPECHA

Rebista mámaru jási formatu jimbo: 68,097,000  
Jarhasti 224 IDIOMECHA jimbo

Awake! is published quarterly by Watchtower  
Bible and Tract Society of New York, Inc.  
© 2021 Watch Tower Bible and Tract Society  
of Pennsylvania.

Para MÉXICO KA CENTROAMÉRICA  
Congregación Cristiana  
de los Testigos de Jehová, A.R.  
Apartado Postal 895  
06002 Ciudad de México  
México

Exentaakajtsi lista ma iámindu  
direksionicha jingoni ixú  
[www.jw.org/tsz/nena-karani-o-uandani](http://www.jw.org/tsz/nena-karani-o-uandani).

## Iáminduechachi uékasinga tsípihua jingoni irekani ka sési. Exe je náki ambakiti konsejuechaksini jarhuataa parajtsi isi irekani.

---

**Ambakiti konsejuecha para tsípihua jingoni irekani** 3

---

**Ambakiti konsejuecha paraka familia ma tsípihua  
jingoni irekaaka** 4

---

**Konsejuecha para sési pájperani máteruecha jingoni** 6

---

**Konsejuecha parachi sési p'ikuarherani imani  
ambe jingoni engachi jatsikuarheka** 8

---

**¿Andichisi kómu nitamakuarhijki, t'arhepini  
ka uarhini?** 10

---

**Ambe engajtsini jorhendajka juchaari Kueraajpiri  
úsindi eskachi ambakiti erokuarhikua ma jatsiaka** 12

---

**Míteni Tata Diosini úsindi eskachi andarhieraaka** 14

---

**Uaakajtsi jatsiani ambakiti konsejuechani** 15

---

**¿Uékapirintsí sánderu ambe míteni?** 16

---



¿Uékasintsí míteni sánderu ambe o  
parajtsi gratisi jorhenguarhini Biblieri  
ambe chaari k'umanchikuarhu?

Exe je [www.jw.org/tsz](http://www.jw.org/tsz)

o karachejtsini je ma indeni  
direksionicha jimbo engaksi  
karhakua jaka.

Ari publikasioni jindeesti para jorhenguarhini Biblieri ambe, ka ánychikuarhita máesti enga úkuarhejka iámindu parhakpinirhu, jarhuatakuarhiparini imani sentabuni jimbo engaksi k'uiripuecha intspijka tsipikua jingoni. I publikasioni no ataranhantasi. Engajtsi uéjka intspini sáni sentabu, exe je pájinani [donate.jw.org](http://donate.jw.org). Enga no karakata jauaka máteru ambe, tekstuecha karakata griegaecheri pitakataksi jarhasti Bibliarhu *Jimbari Eiatsperakua Tata Jesukristueri* (iási anapu karantskatani jimbo). Tekstuecha karakata ebraecheri p'itakataksi jarhasti ixú *La Biblia. Traducción del Nuevo Mundo TNM*, 2019 utusi jimbo.



## Ambakiti konsejuecha para tsípihua jingoni irekani

**“No sési p’ikuarherasinga engani exejka na enga xáni no sési já-nhaskuarhini jaka parhakpinirhu, guerrecha jimbo, enga k’uiripu no jatsikuarheka, p’amenchakuecha jimbo ka engaksí no sési kaajka sapiichani. Joperuni mí-teskia eska sándere orhepani ambakiti ambe jauaka” (RANI).\***

Rani jiáni úspti tsípihua jingoni irekani enga míteapka konsejuechani juchaari Kueraajpiri enga lámu ambe Újka Úni. Engajtsí arhintaaka rebistani, exe je néna engaksini Tata Diosí jarhuataaka arini ambe jatsini:

\* Mójtakukuarhistiksi nombriha.

- Tsípihua jingoni irekani familia jingoni.
- Sési pájperani máteruecha jingoni.
- Sési p’ikuarherani imani ambe jingoni engachi jatsika.
- Kurhanguni andichisi kómu nitamajki ka uarhini.
- Mintsikani eska sándere orhepani nóteruchi kómu nitamakuarhiaka ka tsípihua jingoni irekani.
- Sési míteni juchaari Kueraajpirini ka andarhierani.

Ístujtsí exeaka eska juchaari Kueraajpiriri ambakiti konsejuecha no solu jindeeska para máрку k’uiripuecha, sino para íámindu imeecha engaksí jirinbantajka imani.



# Ambakiti konsejuecha paraka familia ma tsípikua jingoni irekaaka

Temungurhirikua ka sapiichaksí ambakiti regalu máesti juchaari Kueraajpiriri. Imajtsini ambakiti konsejuechani íntskuasti paraka juchaari familia tsípikua jingoni irekaaka ka íksí konsejuecha ióntki anapu liburhu ma jarhasti. Ini jorhenguarhikua jimbo, exeauakachi máru ini konsejuechani.

## Acheeti uéka je chaari uarhiitini

“Uétarhisíndi eskaksí acheeticha uéauaka imeecheri uarhiitichani eska imeechajkumindu na uékakuarhijka. Ima enga uékajka imeeri uarhiitini jandiajkumindusí uékakuarhijti. Ka no nema jarhasti enga no exenchajka imeeri mismu kuerpuni, sino mejori sési t’irerasíndi ka kuidarini” (EFESU 5:28, 29).

Acheeti jindeesti enga orhejtsíkujka familiani (Efesu 5:23). Joperu ambakiti uámba, no no sési kámasíndi témbani ka nijtu jukari erokuarhijki imeeri ambe, sino jukaparharasíndi, kéndasíndi ka xarhatakusíndi eska xénchasínga. Ístu, no méntkisí imani ambe úsíndi ambe enga ima uékajka, sino jánguarhintasíndi paraka témba tsípikua jingoni irekaaka (Filipusá 2:4). Enga uandontskuarhejka témba jingoni arhisíndi na enga p’ikuarherajka ka ambe enga eratsejka, joperu ístu, kurhajchasíndi témbani. No ikiasíndi imani jingoni, nijtu no sési kámajki o no sési arhini (Kolosasi 3:19).

## Uarhiiti janhanharhi je chaari acheetini

“Uarhiiticha janhanharhiaueksí imeecheri acheetichani” (EFESU 5:33).

Enga uarhiiti janhanharhijka imeeri uámbari ka enga apoiarijka ambe enga ima eratsejka úni, úsindi eska pínandikua jauaka imeeri familiarhu. Ka enga uámbari no sési uaaka ambe ma, no k’uratsetasíndi, sánderu sési, seguirisíndi janhanharhini ka no sóntku ikiasíndi (1 Pedru 3:4). Ka enga uéta-

rhijka uandontskuarheni uandanhiateri ma, jirinha-kuntasíndi káni uaa ísí úni ka janhanharhikua jingoni ísí úsindi (Eclesiastés 3:7).

## Así jáma je enganiarperani

“Acheeti [...] kúnguarhi[ati] imeeri uarhiiti jingoni, ka imaksí tsimarhane májku kuerpueuati” (GÉNESIS 2:24).

Enga tataka ma ka nanaka ma tembuperajka, niárasíndiksí familia ma jindeeni. Ísí jimbo, tsimarhanksí jatsisti para jánguarhintani paraksí no méni jámani jurajperani. ¿Néna? Engaksí tsimarhane kánikua uékperakua jingoni kámberaska. Nóksí méni jámapirindi apondini nema jingoni enga no témbepiringa o uámbeení. Enga nema i ambe újka, kánikua no sési p’ikuastasíndi máteruni, úsindi eska nóteru mintsinharhikueuakia ka k’amajkusíndi familiani (Ebreu 13:4).

## Taaticha jorhendaa je chaari sapiichani

“Jorhenda sapini náki jindeeski ambakiti xanharu, nájkiruka jatiriukia no jurajkuati indeni xanharuni” (PROVERBIOS 22:6).

Tata Diosí arhiasíndi imeechani engaksí taatika eskaksí jatsiska para jorhendaa uájpeechani, i ambe arhikuekasíndi eskaksí jatsiska para ambakiti ambe jorhendaani úni ka ambakiti ejemplu ma íntskuani (Deuteronomio 6:6, 7). Enga sapi ma niáraaka no sési ambe úni, ambakiti taatichaksí no jirejiresí no sési exesíndi oksí no sési arhini, sánderu sési, ‘sóntkuksí kurhandisíndi, peruksí ióndasíndi



mókukuarhini’ ka ‘istu ióndanksi ikiani’ (Santiago 1: 19). Engaksi taaticha exejka eska uétarhisínga kastigu ma íntskuni, ísiksi uaati jimbokaksi xénchasínga ka no jimbokaksi ikiani jauaka.

### Sapiicha, kurhajcha je chaari taatichani

“Sapiicha, janhanharhia je chaari taatichani [...]. ‘Janhanharhi chiiti taatini ka chiiti nándini’” (EFESU 6:1, 2).

Sapiichaksi jatsisti para kurhajchaani ka kánikua janhanharhiani imeecheri taati jémbeechani. Engaksi ísi újka, jarhuajpesíndiksi paraka imeecheri familia pínandikua ka tsípikua jingoni irekaaka. Engaksi sapiicha k’éjka, xarhatasíndiksi eskaksi janhanharhiasínga taati jémbeechani, engaksi újka ambe enga uétarhiaka parakaksi imeecheri taaticha sési jauaka. Pori ejemplu, úsíndiksi ambe enga uétarhiaka k’umanchikuarhu parakaksi taati jémbeecha uaaka agustu irekani, oksi jarhuataasíndi sentabu jingoni para ima ambe engaksi uétarhinchajka (1 Timoteo 5:3, 4).

### Iási sési kámasíngia juchiiti uarhiitini

“Ji, acheeti máespa engani kánikua uinhamarhienga, jimbokani ji ísi k’uiriperanhaspka. Joperuni, jorhen-guarhiska eskani ji jindeeska familieri orhejtsíkuti, eskani jatsiska para kurhajchani juchiiti uarhiitini ka uandanhiani imani jimbo ka no uinhamarhikuni. Para Tata Diosi, juchiiti uarhiiti ka ji, májku kuerpueskachi. Jimbosíni jatsika para ísi kuidarini eskani ji na kuidari-kuarhijka. Iní xáni ambakiti consejuecha jimbo, iási sési kámasíngia juchiiti uarhiitini ka juchiiti familia sánderu tsípikua jingoni irekasti” (Rahul).



### ¿Uékapirintsí sánderu ambe míteni?

Engajtsí uékaaka míteani sánderu consejuechani parajtsí úni sési irekani chaari familia jingoni, incha je [jw.org](http://jw.org) ka jaiasku je jima enga arhijka BIBLIAERI JORHEN-GUARHIKUECHA > TEMUNGURHIRIKUA KA FAMILIA.

# Konsejuecha para sési pájperani máteruecha jingoni



**Juchaari Kueraajpirijtsĩni jorhendasĩndi na engachi uaaka sési pájperani juchaari familia jingoni, ánychikuarhitarhu anapu kompanieruecha ka amiguecha jingoni. Exe je na engaksĩ máru konsejuecha jarhuataakia uánikuechani.**

## **Puátspenta je**

Puátsperanta je “enga nema jatsika arhijperakua máteruni jingoni” (KOLOSASI 3:13).

Jamberijtsĩni nema no sési p'ikuastati o juchachi no sési p'ikuastani nemani jimbokachi iáminduecha pekadoriska. Ísĩ jimbo, iáminduechachi uétarhinchasinga eskajtsĩni tekaachintaaka ka juchajtuchi jatsiska para tekaakuantani máteruechani. Engachi ísĩ újka, nóteruchi ikiani pakarasinga ima k'uiripu jingoni. Nóchi jámasinga “no sési úkuntani” ‘imani engajtsĩni no sési

úchika’ ka nijtuchi someni miátantani jarhani ambe enga no sési úka (Roma 12:17). Joperu, ¿ambechi uaa úni engajtsĩni kánikua no sési úchika ka juchachi no úni mirikurhini? Jimajkani, jatsiskachi para tsimarhani uandontskuarheni, joperu kánikua janhanharhikua jingoni. Uékasĩngachi sési pájperantani imani k'uiripu jingoni ka no xarhatani eska ísĩska ambe engachi jucha uandajka o eratseni (Roma 12:18).

## **Kaxumbitii je ka janhanharpeni**

**“Kaxumbikua jingoni sánderu k'éri ambe exea je máteruechani ka eska chájkumindu” (FILIPUSA 2:3).**

K'uiripuechaksĩ uékaati juchantsĩni jingoni jarhani engachi jucha kaxumbitiuaka ka engachi janhanharhikua jingoni kaaska. Imeechaksĩ míteati eskachi sési kámpisĩnga, kurhangutspini ka eskachi no méní uékapiringa no sési úkuani. Joperu, engachi jucha eratseska eskachi sánderu k'éri ambeeska eska máteruecha ka



engachi méntkisi' uékaska eska ísí úkuarhika eskachi jucha na tsitijka, ambe engachi uaaka, jindeesti eskachi no sési pájperaaka máteruecha jingoni ka arhijperanchi. K'uiripuechaksí no uékaati juchantsíni jingoni jarhani ka nóchi uánikua amiguechani jatsiauaka... o jamberi no ma.

## Májkueni kaa je iáminduechani

Tata “Diosí no nani k'uetsapesín[di], sino jaiapanhentasín[di] nákiinterku ma nasioni anapu k'uiripuni enga janhanharhijka imani, ka sési úni” (UKUECHA [HECHOS] 10:34, 35).

Juchaari Kueraajpiri iáminduechani májkueni kaasíndi, no arhiparini naniksí anapueski, náki idiomaksí uandasíni, na xáńksí jatsikuarheski o na jásíksí koloriski. “Májku iurhiri jimbo kueraasti iámindu k'uiripuechani” (Ukuecha 17:26). I ambe arhikuekasíndi eskachi iámindu ermanueska. Engachi iáminduechani janhanharhikua ka uékperakua jingoni kaajka, imaksí sési p'ikuarherasíndi, juchachi sési p'ikuarherasínga ka juchaari Kueraajpirijtu sési p'ikuarherasíndi.

## Así sóntku ikia je

“Ka no ikiatsperani” (KOLOSASI 3:12).

Engachi sési kámpiska ka no sóntku ikiani, máteruechaksí sési p'ikuarheraati juchantsíni jingoni ka exeatisí eskajtsíni uaaka aianguni ambee engaksí imeecha

uékaaka, astajtsíni jurhimberantani, jimbokaksí mite-sínga eskachi no sóntku ikiasínga. Ka enga nema ikias-ka juchantsíni jingoni, iatsitakuarhu mókuntani jarhua-taati máteruni paraka ts'irapintaaka. Proverbios 15:1 uandasíndi: “Enga mókuntskua tekaantskua jingonijka, kénditasíndi ikiatapuni, peru uandakua enga no sési p'ikuastpijka úsindi eska nema sánderu ikiauaka”.

## Intsímpirii je ka agradesidueni

“Sánderu sésiisti intsímpini ka eska intsímbinhani” (UKUECHA 20:35).

Uánikua k'uiripuechaksí no uandanhiasíndi máteruechani ka soluksí eratsesíndi sánderu ka sánderu ambe jatsini. Joperu, engachi jucha intsímpiriiska, sánderuchi sési p'ikuarheraaka (Lukasá 6:38). Imeecha engaksí intsímbirijka sánderuksí tsípikua jingoni irekasíndi, jimbokaksí xarhata-sínga eskaksí sánderu xénchaasínga k'uiripuechani ka eska jatsikuarhekua ambe ka inde ambe úsindi eskaksí agradesidueuaka ka xarhata-síndiksí in-dení ambe enga nema íntskuajka ambe ma (Kolosasi 3:15). Kurhamarhikuarhi je: “¿Né jingoni tsitipirini jarhani? ¿Nema jingoni enga no uandanhiajka máteruecha jimbo ka no agradesidueni o nema jingoni engasíntsímpiriika ka agradesidueni?”. Ambe engachi jorhengarhika, jindeesti eskachi jatsiska para ísíni eskachi jucha na tsitipiringa eskaksí jindeepiringa máteruecha (Mateu 7:12).

## Nóteruni ísí p'ikuarherasíngia eskani sánderu k'éri ambeeska eska máteruecha

“Biblia uandasíndi: ‘Así jáma je teparakuarhini, sino terukukuantá je imeechani engaksí no k'éri ambeeka, ka así jáma je mítetiri úkuarhini’” (Roma 12:16). “I konsejurini kánikua jarhuatasti parani úni iáminduechani májkueni exeani ka parani no ísí p'ikuarherani eskani ji sánderu k'éri ambeeska eska máteruecha. Nóteruni ísí exesíngia eska jucha engachi májku nani anapueka, sánderuchi k'éri ambeeska eska máteruecha ka nóteruni ikiakuasíngia imeechani engaksí máteru relijioni jatsikuarheka. Jánguarhinta-sínga sési kámpini ka íásí tsitísíngia uandontskuarheni iáminduecha jingoni” (Asha).



## ¿Uékapirintsí sánderu ambe míteni?

Engajtsí uékajka arhiantani máteru konsejuechani parajtsí úni sési pájperani máteruecha jingoni, incha je [jw.org](http://jw.org) ka jaiasku je jima engasí arhijka BIBLIAERI JORHENGUARHIKUECHA > TSÍPIKUARHITA KA SÉSI P'IKUARHERAKUA > SÉSI PÁJPERANI MÁTERUECHA JINGONI.

# Konsejuecha parachi sési p'ikuarherani imani ambe jingoni engachi jatsikuarheka

Iáminduecha no arhiparini engachi tembuchatini jaka o nómbé, tumbini ochi jatirinia, uékasíngachi sési p'ikuarherani juchaari tsípikua jingoni. Ka juchaari Kueraajpirijtu uékasíndi eskachi ísí p'ikuarheaaka. Ísí jimbo, íntskuastijtsíni ambakiti konsejuechani.

## Ambakiti áńchikuarhiri máe je

“Áńchikuarhie imeeri jájkichani jimbo iámindu ambe enga sésiika, paraka jatsiaka ambe enga jimbo jarhuataaka náķinterku nemani enga uétarhinchakua jatsiaka” (EFESU 4:28).

Juchaari Kueraajpirijtsíni arhisíndi eskachi ísí exea-ka áńchikuarhitani komueska ambakiti ambe. ¿Andi? jimboka ima enga ambakiti áńchikuarhiri máejka, jatsisínga ambe enga uétarhinchajka ka kéndasíndi imeeri familiani ka i ambe úsíndi eska sési p'ikuarheraaka. Aska úsíndi jarhuataani imeechani engaksí uétarhinchajka. Patronichaksí kánikua jukaparha-raasíndi ambakiti áńchikuarhirichani ka ísí jimboksísi íóni jamberi jatsijti imeecheri áńchikuarhitani. Ísíisti eska Biblia na uandajka enga arhijka eska ambe enga nema jatsijka imeeri áńchikuarhita jimbo, jin-deeska ‘Tata Diosiri intsimperakua ma’ (Eclesiastés 3:13).

## Jurhimbikua jingoni jáma je

Seguruchi jarhaska “eskachi nómbé k'amanharhintskua jingoni jámaxaka, ka uékasíngachi iámindu ambe jimbo sési jámani” (EBREU 13:18).

Engachi jurhimbikua jingoni jámaaka, sésichi p'ikuarheraaka, nóchi k'uratsekua jingoni jámaaka ka agustuchi k'uíkuarhiaka chúrikuechani. Ístu, máteruechajtsíni janhanharhiati ka mintsinharhiatijtsíni. Imeecha engaksí no jurhimbikua jingoni jámajka, nóksí úsíndi jatsini i jási ambe. Jamberi imeecheri konsiensia no sési p'ikuastajti ka chénksí eskaksí máteruecha níaraka ménisí míteni ambe engaksí úni jaka.

## Así jukari tsiti je sentabuni

“Así jáma je jatsikuarhekuekani, sino tsípi je indeni ambe jingoni engajtsí jatsika” (EBREU 13:5).

Uétarhinchasíńchachi sentabu parachi t'irekua ambe piáni ka máteru ambe, joperu enga nema jukari tsitiaka sentabuni uaati no sési úkuarhinchani. Nema úpirindi kánikua jáńguarhintani para úni jatsini sánderu ambe. Enga i ambe úska, úpirindi sánhani arhini jarharini témbani o uámbani, no xáni jarhani uájpeecha jingoni, o asta jamberi níarani p'amenchani (1 Timoteo 6:9, 10). K'uiripu ma enga kánikua tsitijka sentabuni, úpirindi eratseni no sési jási ambe niátani. K'uiripu ma enga kánikua jáńhastiipka uandaspti: “K'uiripu ma enga jurhimbítku jámajka, uánikua kóntperatechani íntsínhauati, joperu ima enga uéjka sóńtku riku úkuarhini níaraati kastigarinhani” (Proverbios 28:20).

## Eraku je sánderu ambakiti jorhenguarhikuani

“Kuájchaku jáńhaskakuani ka eratsekuani” (PROVERBIOS 3:21).

Ambakiti jorhenguarhikua ma, jarhuatasíndijtsíni parachi ambakiti k'uiripu máeni ka parachi ambakiti taaticheni. Joperu i ambejkujtsíni no uaati jarhuatani parachi tsípikua jingoni irekani ka parachi jatsikuarheni ambe engachi uétarhinchajka. Parakajtsíni méńtkisí sési nicheaka iámu ambe jimbo engachi uaaka, uétarhinchasingachi jorhenguarhikuani engajtsíni Tata Diosi íntskujka. Ka Biblia uandasíndi eska imeecha engaksí kurhajchajka Tata Diosini, iámindu ambe jimboksí sési uéranchasinga (Salmo 1:1-3).





## Tsipikua jingoni irekuarhiska imani ambe jingoni engani jatsika

“Nani engani ji irekaka, k’uiripuechaksĩ kánikua uandanhiasĩndi para ióni nirani eskuela paraksĩ jatsikuarheni ka paraksĩ mitekatani. Nájkirukaksĩ jatsijka indeni ambe, nóksĩ niárasĩndi meru tsipikua jingoni irekani. Bibliarini jorhendastĩ jĩndeni parani sési eratsekuntani. Jorhenguarhiska eska sentabu jarhuajpesĩnga, joperu eska no úsĩnga eskachi tsipikua jingoni irekaaka o eskachi meru xénchperaaka. Tsipikua jingoni irekaska imani ambe jingoni engani jatsikuarheka, jimbokarini Biblia jarhuataska ambakiti ambe erakuni úni ka no jukari jukaparharani sentabuni o ánychikuarhitani” (Kishore).



## ¿Uékapirintsĩ sánderu ambe míteni?

Engajtsĩ uéjka arhiantani máteru consejuechani engajtsĩni íntskuajka juchaari Kueraajpiri, ánychikuarhiteri ambe, sentabueri ka jorhenguarhikueri ambe, incha je jw.org ka jaiasku je jima engarhijka BIBLIAERI JO-RHENGUARHIKUECHA > TSÍPIKUARHITA KA SÉSI P’I-KUARHERAKUA.

# ¿Andichisĩ kómu nitamakuarhijki, t'arhepini ka uarhini?



**Juchaari Kuerajpirijtsĩni ísĩ exesĩndi eska imeeri uájpeecha, jimbošĩ no uéjti eskachi kómu nitamakuarhiaka. Jiájkani, ¿andisĩ xáni kómu nitamakuarhinhani jaki?**

## **Primeru k'uiripuecheri kulpa jimbo**

**“Eska pekadu na juka parhakupinirhu, máechakua k'uiripuni jimbo ka pekaduni jimbo uarhikua, ka ísĩ uarhikua pakarani para iámindu k'uiripuecha” (ROMA 5:12).**

Tata Diosĩ kueraaspti orheta k'uiripuechani, Adáni ka Ebani, eratsekua ka kuerpu ma jingoni engaksĩ perfektuepka. Ka Echerirhu ireraspti sésĩ jásĩ lugari ma jimbo engu arhinheenga jardini de Edéni. Arhiaspti eskaksĩ úpiringa mámaru jásĩ frutuni arhani engu jardinirhu jukapka, joperu eskaksĩ máechakuerei no úpiringa akuni. Joperu Adáni ka Eba, arhasptiksĩ imani engaksĩ arhinhapka eskaksĩ no apiringa ka ísíksĩ niáraspti pekarini (Génesis 2:15-17; 3:1-19). Nóksĩ kurhajchaspti

Tata Diosĩni, jimbošĩ ima petaantapti jardinirhu, Adáni ka Ebani. Jima uératinksi úndaspti kánikua kómu nitamakuarhini. Sánderu orhepani, kánguarhiasptiksĩ uájpeechani ka imeechajtuksi kánikua kómu nitamakuarhispti. Iáminduechaksĩ t'arhepispti ka uarhini (Génesis 3:23; 5:5). Jimbochisĩ juchajtu p'amenchajka, t'arhepini ka uarhini, jimbokachi Adáni ka Ebaeri uájpeeska.

## **No ambarhati espirituetheri kulpa jimbo**

**“Iámindu parhakupini anapuecha Noambakitiri juramukua jimbo jarhas[tij]” (1 JUANU 5:19).**

Noambakiti, Satanasisti, ánjeli ma engu no kurhajchapka Tata Diosĩni (Juanu 8:44; Jaṇaskuecha [Apocalipsis] 12:9). Sánderu orhapatini, máteru ánjelichajtuksi niárapti Satanasĩ jingoni úkuarhini ka ísíksĩ niáraspti demoniueni. I noambarhati espirituethaksĩ úrasĩndi imeecheri uinhapikuani paraksĩ támisĩ jánhas-taani k'uiripuechani ka paraksĩ k'uiripuecha no ma-



rhuakuni Tata Diosini, astaksi úsindi eskaksi k'uiripuecha no sési jási ambe niátaaka (Salmo 106:35-38; 1 Timoteo 4:1). Satanasi ka demoniuechaksi kánikua tsitisindi úni eskachi jucha kómu nitamakuarhiaka.

### Engachi no sési ambe erakujka úni

**“Iámindu ambe enga ma k'uiripu juskaaka, indeni ambemindu p'ikuntaa[ti]” (GALASIA 6:7).**

Ménichanisíchi kómu nitamakuarhisínga pekadueri kulpa jimbo ka jimboka Satanasi úsínga eskachi no sési ambe uaaka. Joperu ménisí, jindeesindi jimbo-kachi jucha mismu erakusínga no sési ambe úni ka indeni ambe jimbochi kómu nitamakuarhini. Ísí eskajtsíni na sési nichejka engachi ambakiti ambe újka, ístujsíni no sési nichesíndi engachi imani ambe újka enga no sési jaka o engachi no sési erakujka ambe ma. Pori ejemplu, taati ma enga jurhimbikua jingoni jámajka, enga ánychikuarhirijka ka enga xénchajka imeeri familiani, uaati eska imeeri familia tsipikua jingoni irekaaka. Joperu, enga ch'anaaka sentabu jimbo, kauicheeni o xépitini, uaati eska imeeri familia no ma ambe jatsikuarheaka. Jimbosí xáni sésiiti úni ambe enga juchaari Kueraajpiri uandajka, jimboka ima uéka-sínga eskachi ambakiti ambe jatsikuarheaka, komueska kánikua “pínandikua” (Salmo 119:165).

### Jimbokachi irekaxaka “últimu jurhiatikuechani jimbo”

**“Últimu jurhiatikuechani jimbo [...] k'uiripuecha solu pendiente pákuarhiati para imajkumindu[ksi] sési uérani ka jukari jatsikuarhekuekanksí [...], nóksí janhanharhia[uaati] taati jémbeechani, [...] no ma ambe jimboksí p'ingukuarhiati, sino no sési kámpinksí ka nóminduksí jaiapanhentani ambakiti ambe” (2 TIMOTEO 3:1-5).**

Ini jurhiatikuecha jimbo, uánikua k'uiripu ísí jámasíndi eska na uandajka i profesia ka i ambe xarhatasíndi eskachi “últimu jurhiatikuechani jimbo” irekaxaka. Ístu, Biblia uandaspti eska ini jurhiatikuecha jimbo, japingaksí guerreacha, k'arhingua, k'ératí jenchekuecha ka p'amenchakuecha (Mateu 24:3, 7, 8; Lukasá 21:10, 11). Uánikua k'uiripuechaksí no sési nitamakuarhisíndi ka uarhini ini ambe jimbo.



### Iási k'óruni sési p'ikuarherasínga

“Engani 19 jatiripka nóteruni úspkia xanharani ka arhisptijtsíni eska jindeespka, no sési jási ambe jimbo engani úpka ante de andajpenuni. I amberi kánikua no sési p'ikuastaspti. Ístujsíni jorhendaspti eska Tata Diosísí újka eskachi kómu nítamakuarhiaka. Joperuni, ¿néna úpirini xénchani Tata Diosíni ma enga xáni no sési kámpijka? Ísí tátsekua, ueenaspka jorhenguarhini Biblieri ambe. Jorhenguarhisipka eska Tata Diosí meru uandanhiasínga juchantsíni jimbo ka eska no sési jási ma espíritu enga arhinhajka Satanasi, eska imasí újka eskachi kómu nitamakuarhiaka. Ístuni jorhenguarhiska eska no ióni jimbo Tata Diosí k'amajkuaka Satanasini ka eska sési peentaaka iámindu no sési jási ambe enga i noambakiti espíritu úka. Iási kánikua xénchasingia ini Tata Diosíni enga xáni sési kámpijka ka sési p'ikuarherasínga” (Sanjay).

### ¿Uékapirintsí sánderu ambe mitení?

Engajtsí uékaaka arhintani sánderu informasioni kómu nitamakuari ambe ka néna orhepani uérani, incha je [jw.org](http://jw.org) ka jaiasku je jima enga arhijka BIBLIAERI JORHENGUARHIKUECHA > KURHAMARHIKUECHA ENGA BIBLIA MÓKUANTAAJKA > KÓMU NITAMAKUA AMBE.



# Ambe engajtsini jorhendajka juchaari Kueraajpiri úsindi eskachi ambakiti erokuarhikua ma jatsiaka



Tata Diosijtsini aiachisti eska sánderu ambakiti ambe jauaka sánderu orhepani. Nóteru jauatia kómu nitamakua ambe ka uaati eska-kší k'uiripuecha kánikua tsípikua jingoni irekuarhiaka (Salmo 37:11). ¿Andichisi' újki seguru jarhani eska ís'i úkuarhiaka? Jimboka 'Tata Diosi no k'uiripu máeska para chkuan-derani' (Números 23:19). Ju je exeni máru ambe enga uaaka juchaari Kueraajpiri.

## Tata Diosi k'amajkuati no sési úrichani

"Engaksí no ambarhati k'uiripuecha uánijka ís'i eska uitsakua na kánijka, ka engaksí iámindu no sési úricha tsípajka, jindeesti parakaksí k'amajkunhaaka para méntkisi'" (SALMO 92:7).

Eskachi na exekia máteru jorhenguarhikua jimbo, parhakpinirhu sánderu no sési jánhaskuarhixati. Joperu i ambejtsini no jatsisti para ístu pakatani, jimboka

Biblia uandaspkia ixú 2 Timoteo 3:1-5 jimbo, eska último jurhiatikuecha jimbo k'uiripu kánikua no sési jási ambe úpiringa. Joperu, ¿último jurhiatikuecha ambeeri? Parhakpiniri ma engaksí uinintaka k'uiripuecha engaksí no janhanharhijka Tata Diosini ka engaksí no sési jási ambe újka. No ióni jimbo, Tata Diosi k'amajkuauati imani k'uiripuechani engaksí no ué-kajka jurajkuani no sési járhati jánguechani. Ima k'uiripuechajkusíksi pakaraati echerirhu engaksí uékaaka kurhajchani Tata Diosini. Ís'i eska na uandajka Salmo 37:29, "echeri jurhimbiticheriuati, ka jimaksí irekaati para méntkisi".

## Tata Diosi k'amajkuati Satanasini

"Tata Diosi enga pínandikua íntspijka no ióni jimbo ch'atandurhiati Satanasini" (ROMANOS 16:20, TNM).

Enga Satanasí, demoniuecha ka iámindu k'uiripu no sési úricha k'amajkunhaaka, jimajkani k'óru pínan-

dikua jauati Echerirhu. Juchaari Kueraajpirijtsini aia-chisindi: “No nema chérauati” (Miqueas 4:4).

## **Tata Diosi k'amajkuuati p'amenchakuechani ka uarhikuan**

**Tata “Diosi kutsunharhikuuati iámindu uekua  
ka nóteru jauati uarhikua ka ni uandanhiaa ka  
nóteru nema ueraati o p'amenchani”**  
(JAṆASKUECHA [APOCALIPSIS] 21:4).

Tata Diosi sési peentaati iámu no sési jási ambe engasatanasi, Adáni ka Eba ka ambe engachi jucha úka pekaduni jimbo. Ísi jimbo, nóteru jauatia kómu nitamakua ambe, ni p'amenchakuecha, asta uarhikua jamberi nóteru jauatia. Imeecha engaksi xénchaaka ka kurhajchani juchaari Kueraajpirini, irekaa-tiksi para méntkisi. Joperu, ¿naniksi irekaa?

## **Juchaari Kueraajpiri paraisu ma úntaati Echerini**

**“Desiertu ka echeri k'arhiri kánikuaksi tsipini  
jauati, ka pákua enga no ma ambe újka tsikini,  
tsipini jauati ka ísi tsípaati komueska asafrani”**  
(ISAÍAS 35:1).

Enga Tata Diosi k'amajkuaka no sési jási ambeni, Echeri paraisu máeuati. Sési járhatai parkichaksi jauati ka jardinicha iápurisi ka echeri kánikua t'irekua íntspíati (Salmo 72:16). Maricha, laquecha ka riuechaksi pímbinhanharhiksi jauati ka kánikua ambe jatamiati. K'uiripuechaksi úkuarhiauati k'umanchikuechani ka jimaksi irekaati. Nóteru nema pobriuati, ni no jatsikuarheni t'irekua o xanharu jimbo ísi irekani (Isaías 65:21, 22).

## **Tata Diosi tsítaantauati imeechani engaksi uarhikia**

**Tsíntaatiksi uarhiricha (UKUECHA [HECHOS] 24:15).**

¿Uékapirintsí ménderu tsípiti exeani chaari familiarchani ka amiguechani engaksi uarhikia? Enga Echeri paraisu máeuakia, Tata Diosi enga lámu ambe Újka Úni, tsítantauati. ¿Eranhaska je na engajtsí xáni sési p'ikuarheraaka engajtsí exeantauaka ka engajtsí míteantauaka! Biblia xarhata-sindi eskaksi tsíntaspa sapiicha ka k'ératicha ka eskaksi ménderu imeecheri familiecha jingoni jarhaspa. Ka tata Jesukristu tsíntaspti máru k'uiripuechani uánikuechani japarini (Lukas 8:49-56; Juanu 11:11-14, 38-44).

## **Iási k'óruni meru tsípihua jingoni irekaskia**

“Miásinga engani primeru xanhari kurhaapka eska Echeri paraisu máeuaka, eska nóteru jauakia kómu nitamakua ambe, p'amenchakuecha ka ni uarhikua, terekuarhispka. No jakajkusíreenga. Joperu engani ueenapka jorhenguarhini Bibliani, kuenta íntskukuarhispka eska uánikua ambe jarhaska engachi jimbo uaaka mintsikani eska ambe enga Biblia uandajka úkuarhiaka sánderu orhepani. Seguru jarhaska eska Tata Diosi kararkuarhiska Bibliani. Ióntki, méntkisi kómu p'ikuarherani jarhasírenga ka uandanhiani. Joperuni iási meru tsípihua jingoni irekaskia, asta juchiiti familia ka amiguecha kuenta íntskukuarhesti eskani mójtakukuarhiskia” (Ravi).



## **¿Uékapirintsí sánderu ambe míteni?**

Engajtsí uékajka míteni sánderu ambe enga juchaari Kueraajpiri uaaka k'uiripuecha ka Echerini jimbo, incha je [jw.org](http://jw.org) ka jaiasku je jima enga arhijka BIBLIAERI JORHENGUARHIKUECHA > KURHAMARHIKUECHA ENGA BIBLIA MÓKUANTAAJKA > TSÍPIKUA KA UARHIKUA.

# Mítení Tata Diosĩni úsĩndi eskachi andarhieraaka

Juchaari Kueraajpiri, no solu uinhapikua jatsisti. Ima uánikua ambakiti ambe xarhataĩndi. Uékasĩndi eskachi andarhieraaka ka eskachi imeeri amigueuaka, jimbojtsĩnisi uánikua ambe aiangutia imeeri ambe (Juanu 17:3; Santiago 4:8).

## Juchaari Kueraajpiri jatsikuarhesti arhinhakua ma

“Eskaksĩ k’uiripuecha míteaka eska chiiti nombri jindeeska Jeoba, eskari t’ujku jindeeska Sánderu K’éri ambe iámu parhakinirhu” (SALMO 83:18).

Bibliajtsĩni jorhendasĩndi eska Jeobajku jindeeska Tata Diosĩ engu jurhimbítika, engu kueraaka uniber-suni ka iámindu ambe engu tsípiti jaka. Ísĩ jimbo, imankuchisĩ jatsika para kómarhini (Janaskuecha [Apocalipsis] 4:11).

## Jeoba Tata Diosĩ máesti engu xénchpejka

Tata “Diosĩ jindeesti uékperakua” (1 JUANU 4:8).

Tata Diosĩ Jeoba úrasĩndi Bibliani ka ambe engu ima xáni kueraaka parajtsĩni xarhatacheni na engu jásiika ima. Ambe engu sánderu xarhatajka, jindeesti eska xénchpesĩnga, jimboka iámu ambe engu újka uékperakua jimbo úsĩnga. Engachi sánderu mítejka Tata Diosĩ Jeobani, sánderruchi xénchasĩnga.

## Tata Diosĩ Jeoba tekaatspintasĩndi

“T’uri Tata Diosĩ máeska engu tsitijka tekaatspintani” (NEHEMÍAS 9:17).

Tata Diosĩ Jeoba mítesti eskachi pekadoriska, jimbojtsĩnisi tekaachintajti. Engachi jucha kurhakuska eskajtsĩni puáchentaaka ka engachi jánguarhintaska no úni imani ambe engu ima no tsitijka, imajtsĩni puáchentaati, ka nójtsĩni kastigariauati imani ambe jimbo engachi jucha no sési újka (Salmo 103:12, 13).

## Tata Diosĩ Jeoba uékasĩndi eskachi kómarhiaka

“Jeoba no iauani jarhasti imeecha jingoni engaksĩ kómarhijka [...]; kurhaasĩndi engaksĩ uinhachaparini jarhuajperata kurhajkuarhijka” (SALMO 145:18, 19).

Tata Diosĩ Jeoba no uékasĩndi eskachi ísĩ kómarhiaka eska na p’indenhaka o eskachi úraaka ambe ma parachi kómarhini. Ima kurhauasĩndi juchaari kómarhi-kuechani ísĩ eska taati ma na kurhauajka imeeri uáj-peechni.

## KUERAAJPIRIRI NOMBRI

यहोवा

HINDI

ਯਹੋਵਾ

PUNYABÍ

યહોવા

GUJARATI

యెహోవా

TELUGU

யெகோவா

TAMIL

Jeoba

P'ORHE



## JUKAPARHAKUA AMBE BIBLIERI



Libruecha o particha engaksĩ  
Bibliarhu jaka:

66



K'uiripuecha enga Tata Diosĩ  
úraaka para Biblia karani:

40



Jukari 3,500 uéxurhinistia enga Biblia  
ueenanhapka karanhani, uéxurhini:

1513 ante de Jesúsi



Idiomecha jimbo enga tradusirikuahikia  
Biblia iámu o ma parti:

Jukari 3,000



### Engani arhintapka Bibliani ueenaspka uánikua ambe kurhanguni

“Engani tumbi sapichuepka méntkisi kurha-marhikuahispka, né jindeespi Kueraajpiri. No úsĩreenga sési kurhanguni. Ji exesĩreen-ga eska no úpiringa mándani nasioni jatsikuaheni imeecheri Tata Diosĩni ma o Kueraajpirini ma. Jimbosĩni tsitijka ambe engu uandajka Biblia ixú Roma 3:29, engu arhijka eska Tata Diosĩ jurhimbĩti, jindeeska Tata Diosĩ iámindu nasionicheri. Biblia ístu uandasĩndi eska Tata Diosĩ arhinhasĩnga Jeoba ka eska uékasĩnga eskachi imeeri amigueuaka” (Rakesh).

# Uakajtsĩ jatsiani ambakiti consejuechani

Iámindu Tata Diosĩri karakata Tata “Diosĩni jimboesti” (2 Timoteo 3:16). I ambe arhi-kuekasĩndi eska Tata Diosĩ eratsetaraspka imeechani engaksĩ Bibliani karaka paraksĩ míteni ambe engaksĩ karapiringa.

### Tata Diosĩ uékasĩndi eskaksĩni marhuacheaka imeeri ambakiti consejuecha

“Ji, Jeoba, jindeeska [...] ima engakeni jorhendajka parari sési jarhani, ima engakeni arhini jaka nani engari ísí xanharaaka. ¡Engari meru kurhajchaapiringa juchiiti mandamientuechani! Jimajkani chiiti pínandikua niárapirindi ísíini eska riu ma ka chiiti jurhimbikua komueska marirhu anapu olecha” (ISAÍAS 48:17, 18).


Íksi uandakuecha ísíisti eska pĩmarperakua ma engaksĩni Tata Diosĩ úchini jaka. Ima uékasĩndi eskajtsĩ sési pĩkuarharaaka, eskajtsĩ tsipikua jingoni irekaaka para méntkisi ka imaksĩni jarhuataati ísí úni.

### Chájtsĩ uaaka jatsiani Tata Diosĩri consejuechani

‘Iápuru nasionicharhisĩ aianhpinhaati ambakiti aianhperakua’ (MARKUSA 13:10).

Íksi ambakiti aianhperakuecha uandasĩndi eska Tata Diosĩ Jeoba aiatspeskia eska no ióni jimbo nóteru jauakia kómu nitamakua ambe, eska Echeri paraisu máeuaka ka eska tsitantauaka juchaari familiarichani ka amiguechani engaksĩ uarhikia. Jeobaeri testiguechaksĩ aianhpixati interu parhakpiniirhu ambe engu Biblia uandajka.

# ¿Uékapirintsĩ sánderu ambe míteni?



Achamasĩ ma enga kánikua jánhastiipka karaspti: “Jánhaskakua jindeesti enga sánderu jukaparhakua ambeeka, isĩ jimbo jirinha jánhaskakua. Ka iámindu ambe engari xáni niáraaka p’irani, niára kurhanguntani” (Proverbios 4:7). Juchaari Kueraajpirintsĩni jarhuatasĩndi parachi jánhastiini ka parachi imani ambe erakuni úni engajtsĩni jarhuataaka parachi tsípikua jingoni irekani.

Engajtsĩ uékajka sánderu ambe míteni ambakiti konsejuecheri engajtsĩni Biblia íntskujka, incha je [jw.org](http://jw.org). Jimajtsĩ arini ambe exentaaka:

- **BIBLIA**
- **BIDEUECHA**
- **DIBUJUECHA ENGAJTSĨNI JORHENDAJKA**
- **ENTREBISTECHA**
- **JORHENGUARHIKUECHA**

I informasioni gratisisti ka iáminduechaksĩ uaati exeni.



Késku je gratisi ini rebistani ka engaksĩ antesi uéraka



Arhinta je Bibliani internetirhu; jukari 200 idiomecha jimbo jarhasti

Exe je [jw.org](http://jw.org) o eskaniari je ini kodiguni



921.1-TTS  
210628